

國朝書獻類徵初編卷百七十九目錄

疆臣三十一

楊景素

愛必達

程熹

秦勇均

徐垣

李湖

鄂弼

弟鄂甯

輔德

卷一百一十六

之數

蘇氏

卷一百一十六

國朝耆獻類徵初編卷百七十九

通奉大夫前署江西巡撫江西布政使司布政使湘陰李桓輯

疆臣三十一

楊景素

楊景素江南甘泉人由監生捐縣丞乾隆二年發直隸河工效力
三年補蠡縣縣丞十一年擢交河縣知縣調清苑歷知磁州天津
府保定府十八年授福建汀漳龍道二十三年調臺灣道三十年
授河南按察使三十五年擢甘肅布政使尋調任直隸 命隨尙
書裘曰修查勘隄埝各工嗣因失察雄縣知縣胡錫瑛侵蝕災賑
命交部嚴加議處尋議革職 準諭從寬免但案關劣員乘災舞

弊非尋常失察可比所有革職畱任之案俟八年無過方准開復以示懲儆三十八年 賞戴花翎三十九年山東賊匪王倫滋事命景素於各站酌備車馬更替經理合宜 上嘉之先是賊匪於臨清北水關以住泊糧船結浮橋 上慮賊偷渡直隸境 諭景素帶兵防燬浮橋至是以拆橋殲賊入奏十月擢山東巡撫疏言保甲事宜一牌頭稽查十家飭地方官秉公赴鄉抽驗一門牌書明戶口姓名備查一僧道照民戶例編入一店鋪立簿填註客商名姓一戶丁遷移增減按月稟報再行編查勿委胥役一道府分年巡查一開列每保戶口總數以歸簡易一查開兩邑分界以免推諉一飭牌頭甲長專司稽查保甲疏入報 聞四十年奏請

揀京城健銳火器營遊擊都司等發山東專司教演 從之四十
一年三月 上巡幸山東 賞黃馬褂四十二年正月奏言汶上
縣境至宋家窪舊有引渠之道南入趨王河達南陽昭陽二湖因
舊淤墊窪水停流民田被淹今議自牛鼻潭起至嘉祥縣鄭家橋
止將渠身挑濬河底挖深三尺又黃姑閘金門狹窄挑月河一道
使分流閘外再挑支河二道各長二百五十丈窪底之水盡引入
渠其引入渠河處河水旺渠水弱應於白蓮花寺開支河一道俾
渠水直達鄭家橋入河歸湖所挑各河俱以寬二丈三尺爲度

上嘉之下部議行擢兩廣總督四十三年三月調閩浙總督疏言
調劑鹽商事發本養竈賈以恤窮丁下部議行十二月疏言乾隆

二十四年杭嘉湖三府歉收前督臣楊廷璋奏撥臺灣倉穀十萬石招商運浙糶賣今因江西湖廣被災外販罕至浙西應需接濟但北風盛發臺灣遠難到浙請於福州福甯興化泉州四府屬倉內共撥穀十萬不論商賈糶買聽在嘉湖一帶糶賣仍飭臺灣俟南風汛起按數運還四府補倉其買價酌定每石七錢九分繳貯浙江省地方官給聯二印照交商赴閩領運閩省地方官驗明後截一將穀發給餘一給該商回浙繳銷應需船隻水腳等費聽商自備無庸動款開銷得 旨嘉獎四十四年三月調直隸總督十一月直隸布政使單功曜病歿景素請以道員尙安于易簡二人內簡選一人補授得 旨于易簡爲大學士于敏中之弟誰不知之

楊景素何遽爲此奏耶至尙安雖屬能事然在直隸未久究爲生
手其舉尙安在前者意在于易簡也楊景素著嚴行申飭十二月
故 詔贈太子太保尋 賜卹如例四十五年四月兩廣總督巴
延三奏景素操守不謹復奏獲沙灣盜犯訊出石碁汛水陸弁兵
向有得贓縱容情節俱在景素任內 諭曰楊景素前任直隸總
督時已聞其簠簋不飭甫欲查辦而彼業已身故倖逃法網今沙
灣等處劇盜盤踞肆惡總督責在緝盜安民乃楊景素竟置若罔
聞貽害地方若不嚴行懲儆何以其知炯戒著交薩載查明江南
有河限城垣等項工程應需修葺辦理處卽罰楊景素家屬承修
四十九年三月 諭曰前據福康安查辦粵東歷任總督派令商

總捐貼公費一案楊景素在任未及一年用至六萬餘兩之多其
借端婪索侵貪入己情弊顯然及調閩浙直隸任又復不謹廉隅
用招物議因其已故不忍追治其罪僅就令伊齡阿前赴揚州將
楊景素原籍財產查抄賠抵官項昨據伊齡阿查明田房什物等
項約共值銀二萬一千餘兩楊景素久歷外任貪黷營私其原籍
貲財必不僅有此數楊景素之子楊炤見任兵部主事本應將其
京寓財產查抄入官但念楊炤在京不無日用之需加恩免其查
辦至楊景素在兩廣總督任內所用商捐銀六萬餘兩未便任其
懸宕自應照數繳出解交浙江省以備海塘公用楊炤呈請限四年
分繳五十四年四月戶部以炤逾限未完請革職監追 命再賞

限十年令其陸續完繳十一月 諭曰湖北近年以來吏治闇茸
地方大吏於鹽務匪費任意染指濫觴已極福建吏治亦復廢弛
營伍毫無整頓以致海洋劫盜頻聞釀成林爽文滋事巨案朕詢
訪輿論僉以爲湖北情弊起於陳輝祖福建則起於楊景素伊二
人受朕厚恩用至總督不思潔己奉公實心任事致通省官吏貪
黷懈弛相習成風今伊二人俱已物故而其婪索所得貲財伊子
等又得捐納官職以爲進身之階此等昧良負恩之人豈可任其
子孫復登仕版若不從嚴示懲何以儆貪玩而飭紀綱所有陳輝
祖之子陳山崑楊景素之子楊炤俱係捐納主事均著革職發往
伊犁效力贖罪其餘如有職銜俱查明斥革一槩不許出仕以爲

大臣貽誤地方者戒五十九年七月 恩命釋楊炤回籍

右 國史館本傳

楊敏壯公捷以功 賦籍揚州今爲甘泉縣人敏壯生湖北驛鹽
道懋紹懋紹生古北口總兵鑄鑄生三子長景震嘉興府知府次
景達陝西波羅協副總兵樸園名景素其季子也爲叔父象州知
州以牧後幼多疾骨立貌孱弱不揚然負大志不好章句項後生
一癆一日自割去語人曰多此肉殊礙挂珠且令俯以見人非壯
夫也貧不能自給就江右道幕稍積餘資援例捐縣丞乾隆二年
投效直隸河工以才爲河道忌嫉將笞之公卽躍馬馳去投河帥
憲曰景素功臣後有罪宜殺不可辱且陳河渠利病帥奇之三年

補蠡縣丞八年升交河縣知縣邪教民據斬家庵愚民爲之惑公廉得械其人燔其經典神像以其地爲義學十二年升磁州知州十四年授天津府知府晉清河道丁本生母憂服闋補福建糧驛道調汀漳龍道漳浦縣奸民蔡榮祖謀叛公親督員役率營卒擒之伏誅二十三年調補臺灣道臺灣東界崇山山內爲生番所居山外平埔定爲界內界外界內漢民墾種界外故爲熟番之地生聚日眾界內之民侵展禁限熟番地口促而漢民地漸近生番旣與熟番構釁生番亦乘間焚殺漢民公按界掘深溝築土牛以爲之限請令熟番雜髮畱辮以別於生番永杜假冒先是游民充膺通事社丁設立大通事多爲不法公令社番內通曉漢語者充當

通事革退漢人之充社丁者往年修造戰船入山採木工匠置察
廠每一人率小匠百餘名騷擾與生熟兩番爭鬪戕殺公釐治之
諸弊悉除二十五年正薦卓異補授汀漳龍道巨盜黃薦等九人
肆毒害民莫敢擒捕公生致之伏誅三十二年升河南按察司使
三十五年授甘肅布政司使調直隸布政司使三十九年山東妖
賊王倫以清水邪教煽聚亡命陷陽穀壽張堂邑犯臨清州大學
士舒公赫德率勁旅剿之天子念景素將家子必知兵特旨
命分守河西遏賊不西逸公立詣制府周公元理請兵時周公屯
故城給兵千二百人夜與賊遇公曰賊眾我寡兵新集未可與戰
天子命我守河西銳不可失下令熄火跔伏伺其過乃潛渡河

屯西岸公度兵寡弱未足以禦馬上望數里外高屋問何地眾曰
回人禮拜寺公喜曰可矣大呼曰吾軍中有回人爲將卒者平有
把總自隊中出曰把總回人也公禮接之曰賊眾我寡兵新集恐
不足以禦君之黨忠義素著盍糾結子弟爲朝廷殺賊亦建功
立業事也把總曰諾卽入其禮拜寺得二千人勇氣百倍軍威遂
壯穆維者健卒也夜巡浮橋口見岸東昏黑無人聲獨持刃潛過
橋見一賊臥礮下斬之夾其礮斷橋索而返以人頭繫刀上樹而
呼於營曰吾殺賊矣橋可奪也眾應起立焚浮橋賊趨至斬賊數
百人賊不能西逸竄入舊城以至於滅方公之將督師也舉家驚
懼老幕客邵姓者素豐其餉至是辭去奴僕一夕散竄十數人惟

一幕客二奴從之實所薄者也公臨行謂家人曰我將家子平日以不死疆場爲恨不幸死於賊亦先將軍之榮也至是竟以堵賊得功賊平擢山東巡撫四十一年 皇帝東巡幸臨清燬橋斷路處及逆匪竄據之汪家大宅公陳述剿捕狀 上天悅公請改臨清爲直隸州 許之升兩廣總督擒獲巨盜劉阿起嵩高新尹起明等調閩浙總督入 親過揚州省墓先是伯兄以事謫守北路軍臺仲兄統兵巴里坤公方赴臺灣道任重洋絕塞路隔萬里而年皆六旬外至是兩兄皆在籍聚於舟中飲酒笑樂追維離別各歔歎泣下相去蓋十餘年矣四十四年調補直隸總督卒於官年六十九加贈太子太保 賜祭葬

焦循曰樸園本未余聞之竹廬都尉都尉嘉興太守孫也樸園子
炤字鑑亭亦善余有二子先鑑亭卒故樸園遂無後朱生者黃玗
橋市人也嘗從樸園樸園巡撫山東時朱偶歸市有賣鼈笠叟東
阿人朱以其爲樸園部民氣陵之叟憮然曰楊撫軍方面才也妖
賊蠭起儻西逸則蔓延不能卽平撫軍守河之功偉矣然治齊以
來以騎臨民天子能好人亦能惡人恐不能以功名終君從撫
軍遊宜以慎約相勉今居里中尙假威勢嚇旅人耶朱默然汗下
思叟之言非常人明日蹤跡之不知所在

右別傳焦循撰

